

Izjava OHR-a na konferenciji za medije međunarodnih organizacija u Mostaru

Proces ujedinjavanja Mostara se nastavlja

Kao što znate, Visoki predstavnik se jučer obratio Vijeću sigurnosti Ujedinjenih naroda. Bilo je to njegovo posljednje obraćanje Vijeću u svojstvu visokog predstavnika. Osvrćući se na napredak koji je ostvaren u Bosni i Hercegovini od početka ove godine, Visoki predstavnik ukazao je na korake koji su preduzeti s ciljem ujedinjenja Mostara kao na značajan primjer sveukupnog napretka u Bosni i Hercegovini.

Visoki predstavnik je pripomenuo da će krajem ovoga mjeseca doći do zatvaranja OHR-ove jedinice čiji je rad bio usmjeren na pružanju potpore reintegraciji Mostara, nakon što je ona uspješno završila svoj posao. "Većina općinskih institucija Mostara je ujedinjena ili je u procesu ujedinjenja," rekao je Visoki predstavnik. "Popunjena je većina radnih mjesta za državne službenike na lokalnom nivou prema novom zakonu o državnoj službi rađenom u skladu sa EU standardima. Ipak, zabrinutost izaziva, doduše, mali broj najosjetljivijih pitanja, kao što su imena ulica i vlasništvo nad lokalnom hrvatskom TV stanicom, koje tek treba riješiti. Njihovo rješenje treba očekivati uskoro."

Visoki predstavnik je naglasio da ima još posla koji treba obaviti, te upozorio da neki tvrdolinijaši i dalje pokušavaju razbiti pozitivni zamah koji je postignut, stavljajući nacionalnu podjelu iznad interesa Mostara i njegovih građana koji već dugo ispaštaju. No, on je jasno stavio do znanja da, i pored nekih zadataka koje tek treba završiti, mostarski process predstavlja jasan dokaz da postoji daleko više onoga što ujedinjuje narod Bosne i Hercegovine nego onoga što ga

razdvaja.

Pravni status kulturnih institucija Bosne i Hercegovine mora biti riješen

Viši zamjenik visokog predstavnika Martin Ney održat će danas sastanak sa direktorima sedam kulturnih institucija Bosne i Hercegovine.

Usprkos njihovoj važnosti za istorijski i kulturni identitet zemlje, status državnog nivoa ovih institucija nisu priznali organi vlasti Bosne i Hercegovine, iako je to propisano Aneksom IV Dejtonskog mirovnog sporazuma.. To je rezultiralo ogromnim finansijskim i administrativnim problemima u pružanju dragocjene usluge za dobrobit svih građana BiH. Također, propuštene su prilike za unapređenje turizma u BiH.

Sedam institucija kulture BiH su: Zemaljski muzej BiH, Istorijski muzej BiH, Nacionalna i univerzitetska biblioteka BiH, Umjetnička galerija BiH, Muzej književnosti i pozorišne umjetnosti BiH, Biblioteka za slijepa i slabovidna lica BiH i Kinoteka BiH.

Glavna tema sastanka će biti kako riješiti pravne, finansijske i administrativne izazove sa kojima se suočavaju ove institucije. Nakon sastanka, ambassador Ney i sedam direktora ovih institucija održat će konferenciju za medije u **srijedu, 16. novembra 2005. godine u 16.00 sati, zgrada OHR-a Sarajevo.**